

Ун йиңк порая лэщатыман улты мосал

Округеван кашң товийн нял курт ун йиңкан амарлаты верытлайт. Щит ураңан Тарко-Сале вошан, Овкуртан, Антипаюта па Уренгой куртатан ун йиңк элты сайлаты рупатайт верты питсайт. ГКУ «Ямалспас» па тут хуратты отрядатан рупитты хоятат уталтасайт, хоты йиңк эпатты порайн, муй верты хошты мосал.

Ун йиңк порайн, Овкуртан, курт олаңан омасты хотат лап амарлайт. Ёхан питарад ун йиңк элты сайлаты кеша туняд так щашкан элты верам лытоват дутсайт. Вер этты порайн, хоятата нётты ёх рупатайдад сора верты ураңан, щидытоват лакки дарпитсалдад па дыпидал йиңкан тэкаптасдад. Щаха, щиды кеша верам йиңкан понам хув лытоват ёхан питар хуват пондайт.

Хотдад йиңкан вуйм хоттэл хоятат олаң сыс холта мандат, лэтот, думатты сох холща вудат, щит элты Овкурт куца ху Иван Григорьевич Рочев потар тус: «Куртэв



Хор: vk.com/popovlegshur

шаңкап йиңкан амарлада ки, сот ветхошъяң хоят интернатан улты верытал. Ай няврэмаң хоятата атэд комнатайт лэщатлудв. Ван кут ултыя мосмитты пормас иса ул. Мушаңа йитыйн, интернатан леккар рупитты кабинет ул, ашкудайн лэтот кавартты хот тайлудв». Хоты вера питтыйн, МФЦ

па социальной защита хотңан рупитты питлаңан, мосты нэпекат, муй щиран туңа-щира лэщатты, нэтапса ох ёша пайтты ураңан муй арат лавласты мосал, хоятат сайлаты па тут верат пидан рупитты департамент ЯНАО ёхтылдым куцайт щит па лэрапсат.

Зоя Куртямова ханшам потар

Дорогие земляки!

От всей души поздравляю вас с праздником Весны и Труда!

Первомай – символ добрых перемен. Этот праздник объединяет многие поколения россиян, которые своим трудом создавали нашу великую державу. Впереди у нас много важных задач, которые мы будем решать сообща. Уверен, каждый из нас сделает всё, для того, чтобы наша страна и Ямал процветали и крепились!

Пусть майские праздники согреют вас радостью и теплотой общения с родными и близкими людьми. Желаю вам, дорогие ямальцы, весеннего настроения, успехов и благополучия!

Губернатор Ямало-Ненецкого автономного округа
Д.А. Артюхов

Дорогие ямальцы!

Поздравляю вас с праздником Весны и Труда!

Первомай – это символ солидарности, справедливости и процветания Отечества. Весенний праздник объединяет всех, кто своими ежедневными делами создаёт завтрашний день и вносит вклад в благополучие малой родины и страны в целом.

Наш общий труд и верность общечеловеческим ценностям делают Россию несокрушимой, а народ – непобедимым. Северяне всегда славились высокой работоспособностью. Во многом благодаря ветеранам-труженикам Ямал сегодня – один из самых экономически развитых и динамично развивающихся регионов.

Дорогие земляки! Пусть в вашу жизнь вместе с ярким солнцем придут новые идеи, радость и вдохновение!

Желаю всем крепкого здоровья, оптимизма и энергии для будущих свершений!

Председатель
Законодательного Собрания
Ямало-Ненецкого автономного округа
С.М. Ямкин

Грант охат шитсат

Округева ёхтылдыты хоятат ураңан Пулцават вошан сютсыты хот пуншда. Мойң хоятат ураңан шоши мир ёх думатты сох ёнтда. Округ куся грант охат хуват лапат проект нох питас. Ияха луңатман – сит 26,5 миллион солдува.

Туризм сирн «Отель на Канева» проект мет ар губернатор грант ох шитас. Екатерина Афанасьева ветхосьяң сютсыты комнатайң хот пуншты утсийд. Си ураңан яң миллион солдува шитас. Губкинской вошаң «Лазурный берег Ямала» ялпидаты па Муравленко вошан «Векша» экокомплекс унашак верты ураңан, проектңан вет миллион солдувайн малайңан. Муравленко вошан «Векша» проект хуват нийд-яң хоят сютсыты хотат

омасты утсидат, хухатлдыты юш верда па туристической маршрутат лэщатлайт.

Си тумпийн, сютсыты ёхтылдыты хоятата шоши мир ёх думатты сох ёнтты, «Менаруй» этнокомплекс унашак верты, Канась Пухадаң па Пулцаватан хоятат ампаң ухадан тутлдыты, Губкинской вошан «Опаль тут» улты тахайт (глэмпинг) ялпитты ураңан охат шитты хоятат охлад посатты верытлат.

Кашң грант ох шитты хоятат, нэпекат китты елпийн, Пулцават воша уталтыты ёхтыдысат. Хоты нэпекат лэщатты, муй арат ох пуншты вера эсалты па муй арат ох шитты рахал, потартсайт.

Альбина Тырлина
ханшам потар

Пришкольной лагерята ханшлдыты пора ёхтас



Хор: Альбина Тырлина

Округев хуват там лапат элты, луңан ашкудайн рупитты лагерята няврэмат ханшлдыты рахал.

Там пуш кашң сменяя няврэмат ун кер тылдас хольмаң педа хулмет хатл элты «Госслуги» порталан, МФЦ хотан па ашкудайн нэпекат маты верытлат.

Округеван сот сменаин 7200 няврэм сютсийд.

Олаң смена уц тылдас хулмет хатл элты пуншда. Хой утсийд, кимет сменяята па ханшлдыты верытал.

Альбина Тырлина ханшам потар

«Полярный круг» Арктической олимпиада ус

Олимпиадайн хольмаң педа нийл хоят нох питас, сот няд – призёра этас. Дув кутэдан Москва па Хон Петра вошқан элты, Московской, Тульской область па округ няврэмдув.

Нох питам няврэмат нэмдал ЯНАО каншты па нётты ошаң няврэмат Центр сайтан вантты рахал. Там тал элты си касаспа хут предмет хуват манал. Си олимпиадайн хон мув нийлъяң педа яртъяң регион элты нядмет класс элты ихосьяң класс унты, Белоруссия па Узбекистан мувқан элты 7,5 сёрс няврэм касас.

Хасям ят ай кер тылась хольмаң педа яртъяңмет хатадан етшас. Округ няврэмдув кашң предмет хуват кассат па кашң предмет хося каматса нох питам хоят ус.

«Полярный круг» Арктической олимпиада РФ Министерство просвещения доңалман ул. Призёрата этам па нох питам няврэмат вузата уталтыты манты порайн, баллат шитты верытдат. Сит элты хон мув ветхосьяң уталтыты тахайн ясаң верса. Дув кутэдан МФТИ, Баумана нэмпи МГТУ, Высшей экономика ашкуда, Хон Петра вош госуниверситет, РФ Правительство хося улты Финансовый университет, Тюменской индустриальной университет па Тюменской госуниверситет.

арктическая олимпиада



Хор: yamall.ru

Хоятат пидан рупитты нэ мойлаптаса



Хор: Мария Пуйко

М.В. Пуйко (ям пелакан омасал).

Хасям дапатам Хон мув кусяев Владимир Владимирович Путин, Дорвош районан социальной службайн рупитты нэ Мария Владимировна Пуйко, «Заслуженный работник местного самоуправления» нэман юкатсалды.

Мария Владимировна хоятат пидан рупитал. Рупатайл шеңк яма уятдалды. Хоятат педа шеңк самаң. Дувел уятты хоятат, дув элтайл туп ям ясаңат ясталат. Хун ма дув пидэдан потартсам па моштасэм, муй хорпи дув вешкат хоят.

Потармеман порайн, рупатайл элты каматса ясаң

ястас: «Социальной зашитайн хольмаң тал рупитдам. Ад специалиста усам. 2010-мет тал элты департамент куся нэна улдам.

Аңкем – Елена Васильевна, асем – Владимир Яковлевич Коневқан, Муши вош элты, саранқан. Аңкем аси Саран мув элты. Семьяеван вет няврэм усув. Айтэдан рупатая уталтысаюв, аңкева-асева нётсув. Яма рупитты уталтысаюв, хоятат педа яма улты. Мосаң сишан ма симась рупата пирысам, хоятата нётты.

Рупатаем самаңа тайлэм. Ма пидэман шеңк ям хоятат рупитдат, рупатаел уя-

тлат. Кашң тал ай кургата яңхдам, хоятат пидан уйтантыдам. Потрэмидув, муй инсясапсайт тайлат – инсясдат. Мосты нэпекат лэсятты нётдув. Муши вошан ма рупитты тахаема кашң хоят эхатты верытал, кашң хоят нётдув. Ин СВО хося улты хоятат рутлаң пидан рупитдув. Сит волаң вер, дувилада нётты».

Симась си, Мария Владимировна хорпи веськат, самаң хоятат хоятдув пидан рупитты верэд ул. Кашң ал хоят симась тахая ант палтаман яңхты верытал, инсясты, молты нэтапса мосаң ки, лэрапты.

Вуды ёх улапса элты потар тус

ООН форуман Нью-Йорк вошан, ЯНАО Заксобранияйн депутата улты ху Эдуард Яунгад округеван вуды тащан яңхты ёх элты потар тус па муй хорпи рупата манал, ястас.

«Там талдан мув доватан мир ёх улапса элты нэпек лэсятла. Хон мувеван тащан яңхты хоятат па тохи доңалдайт. Сит элты муцева си потарты мосаң. Хоты округ шоши мир хоятдув улдат, хоты улапсаел шавилат па елды тулат»,

– уйтантопса элты Эдуард Хабэчевич ястас.

Си тумпийн холна ястас, хоты хон мувеван верты шимлаң мир ёх форум шеңк мосаң. Хоты ай кер тыдасян Пулцават вошан касдыман яңхты шимлаң мир хоятат экспертной семинар верса. Си уйтантопсайн тасян яңхты хоятата потартса, муй хорпи КМНС общинайт ураңан федеральной законат ялпитсайт. Хоты АНО «Гранты Ямала» улдат па муй грант хося касты верытдат.



Хор: ЗС ЯНАО пресс-служба

Альбина Тырлина ханшам потар

Юраң па апраң хоятат кассат

Хашам лапатан Пулцават вошан «Северный характер» касапса ветмет пуш манас. Кастыя лапатсот хоят ёхтас. Едпи ун хоятат туп кассат. Там пуш одаң хатл «Профи» хольмаң педа йи команда па «Любители» нялъяң педа нийл команда хухалсат. Кимет хатл па кашң хоят лув юканада хухлас.

Хухалтэд тумпийн паварт адсат, даварт шинайт ператсат, вольк рэп доңда кедә катлащман нох хуңхсат, кед элты сэвам хомтэпат хуват норма нох вуратсат, лакки тадам холап идпийн ваңксат па холна арсыр юш лап ермалты отат каркама арталасат.

Нялхощъяң тал элты лапатхощъяң тал унты ашкудайн уталтыты няврэмат ун хоятат элты касты юшел еша кеншак па ваншак ус. «Семейный забег» па «Семейный заезд на тюбингах» касапсаятан хоттэл мохет юрацсат. «Овс мув шушты юшан» няд тал элты лапат тал унты няврэмат кассат.

Ур ёх газетайн рупитты эви – Анна Яптик ищи там касапсайн касас. Лув ястас: «Ал хухалты па дохан хатмиты касапсаята



Хор: Пулцават Администрация

ма иса касты яңхдам. Тамац касапсайн кимет пуш усам. Ант лэщатыйм хоята шеңк даварт. Там пуш шеңк ар юраң хоят ус. Одаң этап па мойлапса шитам хоятат кутан ханты эвет па похат улдат. Щит хоты ям, мохты

ныла, хой касапса кеша яма лэщатыйс. Ин касапса кимет ят унты па лэщатыты мосад».

Округеван улты хоятлува шеңк ям касты харат лэщатлайт. Тунял «Северный характер» хут юрацты центр пуншса.

Там тал кат пуш аршак щимащ хот пуншты вер ул. Щи тумпийн дохан па еңк хуват хатэмиты хотат вердайт па каман ёнтты харат лэщатлайт.

Зоя Куртямова ханшам потар

Хон Петра вош вантты яңхсуб

Ун кер тыдащан, округ няврэмат #Путешествие89 образовательной тур хуват Хон Петра вош вантты тутдысайт. Хой яма уталтыйл, антидалащидал вуды хотан па худ велпасдыман рупитлат, щимащ няврэмат ун вош вантты пирьсайт. Овкорт элты Светлана Артанзеева, Наталья Лонгортова па Никита Артанзеев яңхсат.

Муй хорпи хорамат ун вошан вантас, Наталья Лонгортова потар тус: «Ма тамац ун воша одаң пуш яңхсам. Щита Москва вош па округ ун вошат па куртат элты ёхтам няврэмат пидан похла акатсаюв па рупата педа елды уталтыты университетат, вош хорамат вантты, лекцияйт хулантты иса яха тутдысаюв.

Ашкуда етшатын, елды уталтыты ищи па ун воша манты мосад. Тата муң арсыр уталтыты хотат вантсуб. Тухал хотлаң Хон Петра улмад порайн верман усат. Щита уталтыты Овс мув няврэмат пидан уй-

тантсуб, лув потартсат, маты университетан муй рупата педа рахал елды уталтыты.

Шушидысуб, вантсуб, шеңк ошхуль ус хуланттыя.

Водаң Ляль порайн парам



Хор: Наталья Лонгортова

Государственной университет морского и речного флота им. С.О. Макарова гостевой нэпекан Наталья Лонгортова мойлапса ясаң ханшал.

хоятат каштаты кев хар хоща яңхсуб. Йи ун кев хар хоща кашң мув сыл атэд кев хоран верман ул. Округев нэм ханшам кев хора муң дыдаң лыпшат понтсуб. Кимет хатл лекция хулантсуб, хоты Водаң Ляль порайн Хон Петра вошан хоятат дэлды шукащман усат па рупитсат.

Етна пелка «Ромео и Джульетта» спектакль вантты театра тутдысаюв. Хорамаң ун хотан хоят тэдые. Каш альты хоятат, эвалты щирн, шеңк яма ёнтсат. Едпи щимащ ёнтотсайт муң телевизор хуват туп вантсуб.

#Путешествие89 образовательной тур лэщатам хоятата пумащипа ясаң ястаты вутцидам. Там шеңк ям номас, вуды хотаң па худ велты ёх няврэмдал, ашкуда етшаты елпийн, ун вошат вантты тутдыты. Хой мосаң елды уталтыты щи вош пирыйл, хоя па мосаң лыпелан даварт питад ун вошан улты па ёдан хашаң».

Зоя Куртямова ханшам потар

Туса вератты ханты нэңиет

Кашң порайн вуды ёх емаң хатлатан хорамаң сохан ханты нэңиет шиялаты рахал. Хой ал вантты ёхтыдыйл, хой рутлаң пидан уйтанти, хой тынасты. Там лопасан Надым воша ёхтыдыйм ханты нэңат элты потрэм тулэм.

Лаборовской нюраман касдысув

Елена Павловна Тайбери Приуральской мув Охсар вош элты ёхтыдыйс. Ма лув пилэдан потрэмисам. Ясңал элты: «Катра ма тасян яңхсам. Лаборовской нюраман касдысув, Охсар вош элты катсот километра. Ин ветлэм тал куртан улдам. Охсар элты ныкды ветхосьяң километрайн



Елена Павловна Тайбери
Вера Кузьминична Горшкова пидан
яха дойдатан.

хот тайламан, сита икем пидан улдаман. Икем худ велман ул, вуды ухлат верал. Ма па ёнтаслам.

Аңкем-асем хантэңан усңан. Ма нийл няврэм тайдам: хут эви, кат пох. Эвидам холд рупитлат: хой леккара, хой уталтыты нэңа, хой ох луңатты нэңа. Ай эвем туп тащан яңхал. Похңалам – итал тащан яңхал, кимет похем Надым вошан ул, ин СВО хося.

Округеван там тал хоттэл тала постаман ул. Ямал хуват манам касапсайн эвем Анна Боровикова семьяел пидан кассам. Округ касты хоттэлдат кутан нох питсув. Ун кер тыдась ветмет хатадан Екатеринбург воша округ элты яртъяң семья яңхас, кат хоттэл нох питас. Лув кутэдан Лонгторват Овкурт ханты хоттэл. Уйт дор тыдасян Москва воша касты мандат.

Ситы си улдув. Там емаң хатла ёнтам пормасдам тутдысам».

Емаң хатла верам пормасдам тыныты тутдылдам

Ёмвош округ элты яңкем тал Надым воша вуды ёх емаң хатла Татьяна Архиповна Малахова ёхтыдыйл.

«Ма Сургутской район Русскинской куртан улдам. Эви опрась нэмең Климова. Хус тал кем Казахстан муван усам. Сидта Курганской мува мантсув.

Си юпийн па Ёмвош округа. Ёхи ант мантсам, аңкем-асем антома йисңан, хотэван па хоятат улты питсат. Юля опең Харсойман ул, яем Павел Климов Канась Пухалаң.

Ай пора элты сак каратдам, ты ёхтыдыты порайн сак элты верам пормасдам, сувенират тутдылдам. Ай эвем сак элты рупатайт верал, лувидал па тата эталтылдам», – Татьяна Архиповна ястас.



Тарко-Сале вош нэңие

Вера Кузьминична Горшкова Тарко-Сале вош элты ёхтыдыйс, рупатайт тутдыйс, каматса ясаң ястас: «Аңкем-асем – Кузьма Павлович па Еня Иревна Серасховңан Катравошан усңан. Ма сита энампсам. Ин няврэмдам, хидыдам пидан Тарко-Сале вошан улдам. Пенсияя манты елпийн, каш верты хотан хус тал рупитсам. Кашң порайн вуды ёх емаң хатла ёхтыдыдам, ёшан верам пормасдам тыныдам».

«Кочевая семья» касапсайн касас

Юлия Германовна Лонгтортова хоттэл хоятлаң пидан «Кочевая семья» касапсая Овкурт элты касты хара яңхсат. Сит элты каматса ясаң ястас: «Надым воша олаң пуш ёхтыдысув. Касапсая хоттэл хоятлама ёнтам сохат тутдысам. Муң пилэван холна аңкем-асем, упңалам усңан. Лув па сохдал альсат. Вет думатты сох эталтыты мосас. Ёх, нэ хоятат верам отлув: саклаклат, шашкедат, вайт, тупрат, няврэм порхайт, вуды кепал элты ёнтам ханшет, сах, нуй саха ёнтты ханшет, катра охшамат, ёрн хырат, тутсяңат. Муй верам па тайты отлув, иса эталтыслув.

Муң вуды хотан яңхлув, Щаня

ёхан нохлы пела, Кев тум пелка касалдув. Сусан па ёхды охалдув. Икем тащан яртъяңмет хотан МСТ «Мужевской» нийлхус тал рупитал. Лапат тал бригадира ул. Ма ихосьяң тал рупитдам. Кашң сус вуды хорты тахая вудылув нёхия мийдылдув. Муң катсот молтас, хой сог, хой худамсот. Кеплат, оңтат иса совхоза малдув. Муңева ант хайлайт. Си елпи вет кепал тэл муңева мийдысат.

Кушкепа ин ялап сир этас, няврэмлув охан еша сохаптадайт. Муң рупитты охлув иси шимлат. «Буранан» яңхман, охлув бензина, «Буран» сюңка мандат. Лэты кеман туп».



Хор: Альбина Тырлина



Хор: Вера Климова

Сэңк хорыман олта масл

Ямал хуват кадаңаң нэңхэт касалты пора ши ёхтас, щитна, кадаңат машинайт яңхты ёс хоца ванамадэна, сэрак ёс элты этта веритлат, ёс сопшы манта. Машинайна яңхты порайна товына па сусн сэңк хорыман олта масл.

Мет хорыман масл Пулцават эвалт Охсарка па Пулцават эвалт Надым педа манты ёсчанна.

Ловатдна Приуральской район машина ёсна хутхощъёң нэман верам кадаң вастаты щеп верман ол. Ветсат метра эвалт нийдсот метра хува-

тат. Ши томпына кадаңаң нэңхэт алаң эвалт ГИБДД хоца айкел китта веритлат па лув касалтэл сыс ёс лап тохрамтыда.

«Тал хуват муң ар пелак лайду, ям таха ки мощатлу, тыдащ кем йи тахайна лайта рахал, кадаңду щутщадат, муң щутщалу. Товына касалты порайду ёхаттэдна, муң Ас том пелакна ёхаттэв ораңна йи элты манлу, суювду Ас там пелакна ки посханлат лувилал щёкат питл, щитна тэрмалалу. Талта кепа холна щитна сара манлу, тащат йи элты манта питлат па кадаңду яха ант

ат сорадалат. Щит ши юпина молтас ропата.

Машина яңхты ёсат муң ар пелак хатл навина мандалду, ищи тэрмалалу. Там йисна машина арры йис, патдамна кадаңду ёс элты этлат, велдайт. Касаң нэңху кадаңал дыл лув эвалтэл лайл, щитна муң кадаңду сара васталду», – Устин Тайбери лавас.

Щитна машина ёс хуват яңхтанна хорыман олаты. Ёс элты кадаң вастаты тахайтна нэман эхтам пормасат вантман таяты.

Вера Климова хансам потар

Приуральский нэңхэт ям вер версат

Приуральский район Охсар похална благотворительной ярмарка па концерт «Светлый ангел» манас, кас верты хатна верыдыса.

«Касаң нэңху Паска емаң хатл педа верам пормасат лотта веритсат. Касаң сувенир щита нявремат ясна верман осат. Нявремат элты самдална сэңк хасам, хонты верам пормасалд вул нэңхэтна омщадам лотдайт. Ма иёлты оцсам, муң приуральский нэңхулу сэңк самаңат, масты порайна хонты харты сансна ант кердалат. Ма сэңк лытлам, тата актам охат нявремат элты ат нятлат!», – Приуральской район коца Иван Сакал



Хор: Андрей Ткачев

лул телеграм-каналал хоца хансмад.

Щита актам охат «Ямине» фонд педа Надым васна олты холам мосаң няврем ораңна китсайт. Ши томпына концерт

онтасна актам хутъёң щёрс ищи фонд педа мантсат.

Пулцаватна «Светлый ангел» акция ищи верда.

Вера Лонгортова хансам потар

Вул емаң хатдал ши ванамад

Папус, 2025-мет тална, Пулцават 430-мет талалды йил. Щимащ вул емаң хатдал маса вул васу масл хорамми верта. Щимащ партапсы Ямал губернатор Дмитрий Артюхов Пулцават коца Алексей Титовский элты мас.

«Пулцават – щит муң округу хуват волаң васу, сэңк тащан история па культура тайл.

Вул емаң хатдал маса мет хорамми йита масл. Ши ораңна муң комплексной программа лэщатсу «Салехард – 430». Мет алаңна щита йилап хат верты верат лоцсат, нэңхэт ям хататна мата, хат хоцнат ямас лэщатта. Муң ищалтэв итта мет вул задача лайл – васу хорамми верта, нэңхэт элты олта ям ат ол», – Ямал губернатор Дмитрий Артюхов лавас.

Итта Пулцават нэңхэт веритлат telegram-канал па «ВКонтакте» сообщество хоца китта, мала лолан лув вас лыпина ямас лэщатта лытсат. Касаң нэңху китам идея пидна ропытты ораңна, вул вас коца Алексей Титовский общественникат команда актас.

Вера Климова хансам потар

Нисыман хул велты касапса манас

Касаң товы Приуральской район Белояр похална ёдк илпи эвалт нисыман хул велты касапса верда. Там пус па, хой щимащ хул велты вер самадла ванна тайдалды, яха актыдысайт.

Хыщам талат ши касапсайна касаң нэңху щирдна веритас хул велта, там пус па топ хаттэдна рахас. Ловатдна холъёң педа вет хаттэл ос.

Касаң хаттэл касты ораңна холам щёсна масайт. Хой ад вантта ёхтыдыяс, лув па ад ант амассат, хоц ант паттэт ораңна енттасайт, каврам хасык йицкна енштасайт.

Нох этты ораңна мет ар киде хул катта масас. Щиты Сергей па Татьяна Поповы алңищ этсаңан, ийикел мет вул хансаң хул мощатас.

«Муң ай тэдна хул нисылу, ма нэмна самамна сэңк омащ тамащ хул велты щир. Ям хатл ат ол, атам хатл ат ол, торам педа ант вантлан. Тамиты наман амасман, нэңху самад щутщал, ши юпина васна ёхаттэнна номсан кон. Щитна топ щутщаты хатлат ванамата питлат, муң ийемем пидна нисыдата актащта питламан.

Тамащ касты харатна нох питты ораңна ай масл, там хатл ма аям ёхтас, мет вул хул ма хоцем питас, папус щит век па нэңху олта веритл. Щитна касаң нэңху элты ма лытлам лавта, самдан ант ат саклат, папус па ол», – Сергей Попов лавас.

Там товына щимащ касты харат касаң ай похлатна мантсат, ям хонты нэңхэт щутщаты ком мощатлат.

Вера Климова хансам потар



Хор: Вера Климова

«Ясңем ищипа хулда...»

(Олаң шупал №16 (1215)
луңталн)

Ун кер тыдащ хуламхощяңмет хатадан Пулңават нәпек луңатты хотан «И всё-таки услышат голос мой...» яңмет уйтантопса манас, Прокопий Ермолаевич Салтыков каштаса. Удмал хуват, там пуш лудан, лув ярсот тада йис.

**Сәма питам хатлаң кеша
мойлапсайн версәв**

Татьяна Власовна Гостюхина 1994-мет талан «Ямал» телерадиокомпанияйн рупитты питмадан, Прокопий Ермолаевич хутъяң тада йис. Сәма питам хатлаң кеша рупитты мохилаң номас понтсат мойлапсайн лувел верты: «Овс муван улты хоята муй мосал? Лув худ па вой велпаслаты яңхал, хошам свитеран мойдаләв. Мойлапсаты ёхатмеван Прокопий Ермолаевич еша хол еләмас, туп сәмлаң хуват ныса, амтас, лавласас, ант ёрәмаса.

«Ма «Салехард. Воспоминания» луңатты нәпека потрат акат-мем порайн, округ санитарно-гигиенической лабораторияйн куңая улам Вера Александровна Фёдорова пидан уйтантысам. Лув Прокопий Ермолаевич ийимел пидан рупитас. Щи книга лыпийн тамиты ханшман ул: «Прокопий Ермолаевич шеңк вана ант уятсәм, ийимел пидан яха рупитсаман па няврәмламан йи классан уталтысңан. Рита имел ям нә ус, рупатайл яма уйтсалды па сора версалды, нәмолты порайн партты ант мосас, рупитты тахайл сыстама тайсалды, руң ясаңан яма потарты хошас, нулама полащ ант тутдыйс. Муй арат яха рупитсаман, нәмолты порайн лявта ант питыдысман, шеңк ям хоят ус», – Татьяна Власовна ястас.

**Рупатайл «Север»
журнала понтса**

«Хотәм элты ким эттәман, кимет хотвол ныса. Ма ванттәман ханты ики щита ул. Щутщаты хатлатан руң духаслад лув хощайл ёхатлат па ёх велпаслаты актащлат. Иса нумассам, амуй щиран духса уллат? Радио рупатая ёхатмеван, Прокопий Ермолаевич духас икел Юрий Андреевич Кукевич волды ма куңсаема ус. Прокопий Ермолаевич па щи порайн пенсия манман ус. Нәмал туп хулдыләм,

нумастәман ахой щит, иса ям ясаңан нумла. Имомты хатл, хот пуңдәман улты ханты икем ма хощәем рупатая ёхтас. Пуңалта ванттәман, там рупатайл волды лув щи куңа ху. Кашң хоятан уятла, кашң хоят уща верал, улапсайл элты инцасла. Щиты мин уйтатсаман. Пора хащам юпийн, рупата щирн лув хощайл ёхи яңхсам, ар пуш лув пидәлан потартыдысам.

Ипуш па лув муң хощәев ёхтас. Нәмолты порайн щиты лувел ант вантысәм. Сора ёхи доңас, аматман мин педаеман потартал: «Зина, Макар ма нынан мойлапсайн туслам. «Север» журнал лыпийн рупатаем понтса. «Тәкаң ики ар» ханты ясаң элты руң ясаң толмащсәм». – Рупитмаң порайн нәмолты



ант потартас, хун рупатайл етшас, велци ястас. Мин па лув пидәлан аматсаман, лышев арийл, щи доват щи ям айкедан тусайман. Прокопий Ермолаевич ар ханшам рупата тайс. Удмал порайн «Самем арийл» па «Мурхи сун» кат ай сборник туп этсаңан. Ма номас тайдам, рупатайл яха акатты па ялпа луңатты нәпекан эсалды. Нәтты хоят туп мосал. Муң ант ки верләв, хойн верла. Ханты мир хоятлув мет такан муңев мослат», – Зинаида Викторвна Лонгторова ястас.

**Лышем мет тащәаң
па щуняңа йил**

Татьяна Владимировна Заваль-



ная ОГТРК «Ямал – Регион» хося 1998-мет талан рупитты ёхтас. «Высокая проба» рубрика тувмадан, Нина Михайловна Егерь уталтыты няврәмлаң пидан Л.В. Лапцуй, Р.П. Ругин, П.Е. Салтыков луңтарат луңатты па ханшты студияя ёхтылдыс. Прокопий Ермолаевич ханшам луңтарлаң элты лув щи порайн велци хулас. «Там ван, сорнең луңтарыет китайской муй па японской луңтарат хорпет. Ултыйн, щиты,

Хала мув пелак ханшты хоятат ханшлат, – Татьяна Владимировна ястас. – Прокопий Ермолаевич луңтарат луңаттәман, лышем мет тащәаң па щуняңа йил. Щи доват щи ям хоятые удмал. Манәм щикем щаль, удмал порайн муя ма лувел ант уятсәм».

Ултәв хуват иса нумләв

Питлор куртан Зинаида Викторовна Лонгторова ханшам нәпекал «Араң, монщәаң, потраң ёх» вантопса верам порайн, каш верты хотан ма Валентина Семёновна Родямова пидан уйтантысам. Лув ултал хуват иса Питлор куртан ул. Хольмаң

молтас тал ай няврәмат хатл сыс шавиты хотан рупитас. Мет олңа сохат пусас, щалта завхоза, юхат уталтымаң юпийн, хус молтас тал воспитателя ус. Ин пенсияйн ул. Ма лувел инцассәм: «Там ялпа этам луңатты нәпекан хой уятты хоятән элты ханшман ул?»

«Там нәпекан Прокопий Ермолаевич Салтыков ханшам луңтарлаң понман уллат. Лув ванта, ханты мир хоятат ку-тан, ищи ханшты хоята ус. Елпи муң хощәев воспитателя рупитас, шеңк самаң хоят ус. Каникулы порайн, ёхи вутәван, ащем Прокопий Ермолаевич пидан потрәмитаң юпийн муң педаев ястыйл: «Щи хоятән шеңк аялтае, тусаңа потартаң. Ястам ясаңлаң оша понман тайты мосал».

Интернатан улты няврәмат иса лувел хулантсат. Нәмолты порайн такан ант увас, ликащман ант потартас. Ястатаң, няврәмат мохты лувел хулмаңлаң. Катра пора няврәмат ун хоят педа хулантман усат. Муң щи порайн, ашкулая вуймеван, руң ясаңан ант хошсув, иса ханты ясаңан потартсув. Лув муңев ханты ясаң хуват руң ясаң уталтасды. Муң лувел шеңк мосмаңа тайсәв. Ултәв хуват иса нумләв».

Зоя Куртямова ханшам потар

Вурты суювие

(Олаң шупал №16 (1215)
луңталн)

Уртые и хатад вератты харан молтэд нэхарман омасал, вантал, вурты суювие тыел-тохел эпсатты питас.

Кимет хатад вантал, вурты суювие па эпсатты питас, хомас паята нох хуңхамтыял, щалта па нох волдыяс, па ротая нёта лэты питас.

Худмет хатад вурты суювие мет такан эпсатты питас, хомас лоңда хуңхамтас па унт педа навармас. Имомлты щакра ёхтас па худам пуш шаншал мохты дарэмас па вет нярава хоптыя йис. Мит ёхат вет нярава хопты моцатсат па нэңат ухда кирсалдал. Эви нэңат ухда омасса. Нэ моцатам ху туп уккел хол эңхсалды, вудыдал ед навармасат, лув щиты лойман хащас. Нэңат ухадан омасты отэв щиты ант вантсалды,

Щи пуляң ин эвев камн шушидыс, вантал, хоят ёхтас. Ёхи лоңал, па апщел педа ястал: «Ким эта, щита мояң хоят ёхтас, ёхи вохи, шайн йинщалтаман». Апщел ким этас, мояң хоятал пидан вуца верас, еша потрэмисчан па шай йинщты ёхи вохты питсалды. Мояң хоят ястал: «Манэм манты мосал. Куцаеман ляватдаям. Вудыдам ант уятсалдам». Муң похев потарал: «Шай йинща, щалта манлан. Юшен хув». Мояң ёх ёхи лоңас, ин похев паркатытал элты, эви пелка лоңас. Шай йинщтэлан хулдэл, каман вохатты щакрал. Мояң ёх инщасал: «Хой щита вохатал, ванан нэмомлт вуды ант ныса?» Эви ёхды ястал: «Щит мин авкаеман».

Ким этмелан, нэмомлт ухал вурты хоптэт пидан антом, туп вурты суювие хухатдыял. Ин мояң ху эви пидан улты хащас.

Хув-ван усат, и пораян вурты суювие па эпсатты питас. И хатад еша эпсантас, кимет хатад хомас пая нох хуңхамтыяс, нёдал тыел-тохел шашидысды, худмет хатад такан эпсантад, ун хомас пая нох хуңхас, щалта унт педа наварман манас.

Щи пуляң и тащаң ики эвел поры верал. Мит ёхдал педа ястал: «Эвем вет нярава хоптыя киралан». Муң вурты суювиев щи ёхтас, щимащ потар хукас, доялтыты хара лоңас, худам пуш шаншал мохты дарэмас па вет нярава хоптыя йис. Мит ёхат вет нярава хопты моцатсат па нэңат ухда кирсалдал. Эви нэңат ухда омасса. Нэ моцатам ху туп уккел хол эңхсалды, вудыдал ед навармасат, лув щиты лойман хащас. Нэңат ухадан омасты отэв щиты ант вантсалды,

холта туса, щалта, идампа вудыдал ил лойсат.

Ин муң эвев нэңат ухал шиядас, дыпия аңкармас, вантал, нэ омасал, ёхи вохсалды, шаян йинщалтасды. Ким этмелан па нэмомлт ухал, нэмомлт вуды антом, матты шива йисат, туп вурты суювие хухатдыял. Щалта ин нэңал апщел хоца лэчатсалды. Па елды улты питсат.

Усат, усат, ин похев куртала яңхты номас верас. Опеда потарал: «Яңхдам, куртэман вантлэм, мосаң, антеман па ащеман лыдңа хайсалды, ищипа дын няврэман». Опед па имел ёхды ператты питсаңан, ант эсалдалан. Туп веңал моштасды, муй щиран лув хотал элты марэмияс па ястас: «Яңха, ванты па тумтака ёхи юва».

Актащас па шушмияс. Еша шушас па ёхды аңкармияс — вурты суювие лув юпелан хухалдал. Апщие нумасал: «Яна ки лув меңк, ин манэм ёхи лэлды».

Туп вурты суювие апщие элты ёхатсалды, лув ещадтэл дояс па лув элтэл тамаш рув йил: «Хун наңен атом питад, мосаң,

молты элты палтаман, манэм нумалми». Щалта вурты суювие навармас па ёхды ал китса.

Апщие шушас, шушас па куртала ёхтас. Вантал, курталан нэмомлт хоят антом, холдыя меңкан лэвамат. Удам хотал хоца ёхтас, ёхи лоңас, еша опсас. Вантал, ишни элты, курт тум олаңан меңк ики хухалдал. Хонал уна-а ювмал, сэмдал ал куцлат. Таңха, хоят эпал моштас, апщие педа хухалдал.

Похие ким этмас па унт педа хухалдас. Меңк ики лув юпелан. Щи элты ёхатла, там элты ёхатла. Ин апщие вурты суювие элты нумалдас. Щи кутан унт элты ун хорамаң унт хор этас, лув ещадтэл хухалдал. Апщие ешае ед хатэмас, унт вулэд лув мохтэл хухалдас, меңк ики оңатлада нох омассалды па унт педа навралсалды.

Апщие ёхи ёхтас, вантлалды, вурты суювие антом. Яң хатад усат, вурты суювие ант ёхтыдыяс. Нумаслат: «Вурты суювие Тураман ки нётты китыдыса». Щалта мохилув актащсат па куртэла касалсат. Щи пора элты яма, меңк, куль ант ватман улдат.

Эрнст Куртямов монщам монщ



Ай няврэмие, щуняң пошхиета



Хор: mixufotos.ru

Ай шоврыет...


Ай шоврыет
Олты лаңхалайт,
Олты лаңхалайт
Ванты шеңк айиет.

Бегемот

Бегемот арыты вутцияс,
Уңдал пел пуншмияс.
Туп ясңал век ант щаңал –
Такан омиял па ладал.



Хор: proza.ru



Хор: monograms.ru

Мисые

Мисые, мисые,
Оңтаң охие!
Няврэмие ал нюхладн,
Мис йиңкан миялн!



Хор: Аллина Тогрова

Ампие

Нови курыет
Ай ампиет тайл.
Нови падыет
Ай ампиет тайл.
Туп нёдыел питы –
Умащ дув тамиты.

Детский сад

Сама мосты детский сад,
Щита няврэм тэдые.
Яха улты муңев ям,
Тара-тара-тара-рам!



Хор: Аллина Тогрова



Хор: Аллина Тогрова

Муя луңев ваные?

– Муя няврэмата
Луңев ант тармийл?
– Луңев, мавнянь хорпи,
Сора холамытй!

Ханты мир мутраяң ясңат

Турам вой-хул сәңкты – карәк.

Ләты порайн милән нох әңхи, ләтотдан миләнән ләдайт.

Турам йи хатлэв па щи усэв.

Ин холта номаслам кердадат, тохи щи карэмадам.

Ойн ки ёхатсайн – пуңал хоятән ал ёрэма.

Хоят ал лаката, ойды питдан.

Тараң вера мантэнан – паптапен ёдан хайи.

Мойң ху хорасан ёхатсан, муя па лэваса улдан?

Ханты хоят нэм ант ки тайл, дув оңатды хор хорпи.

Етан такан няхты па ёнтты ант рахал – Пукан имет ёхатлат.

Ун хоят шанш мохты ал мана – кашаңа йидан.

Газета

«ЛУХ АВТ»

Адрес редакции:
629003, ЯНАО,
г.Салехард,
мкр. Богдана Кнуянца,
д.1, каб. 106
(34922) 4-68-63

E-mail:
luh.avt@yamal-media.ru

Учредитель

Департамент внутренней политики
Ямало-Ненецкого автономного округа
(629008, ЯНАО, г.Салехард, пр-кт Молодёжи,
д.9, каб.708)

Газета зарегистрирована

Управлением федеральной службы по надзору
в сфере связи, информационных технологий
и массовых коммуникаций по Тюменской
области, ХМАО-Югре и ЯНАО
19 апреля 2012 года
Регистрационный ПИ № ТУ72-00558

Тираж 1340 Заказ 0572

Подписные индексы:
на год – ПА700, на полугодие – ПР561

№ 17 (1216)

Газета вышла в свет 27 апреля 2024г.

Подписано в печать 25 апреля 2024г.

по графику: 16.00

фактически: 16.00

Газета выходит по субботам

Цена годовой подписки 88 руб.,
в розницу не распространяется

Издатель

Департамент внутренней политики ЯНАО
(629008, ЯНАО, г.Салехард,
пр-кт Молодёжи, д. 9, каб.708)

Отпечатано в АНО «Ямал-Медиа»
Юридический адрес: 629003, Ямало-
Ненецкий автономный округ, г. Салехард,
мкр. Богдана Кнуянца, д.1, каб. 106

Фактический адрес: 629007, Ямало-
Ненецкий автономный округ, г. Салехард,
ул. Чубынина, 39А

Генеральный

директор
АНО «Ямал-Медиа»
Зулинова
Марья Андреевна

Главный редактор

Яковлева
Аллина
Кирилловна